

For dia 1 di januari ultimo caba

## Gobierno a cumpli cu su promesa: A separa Aduana for di Servicio di Impuesto

**FOR** di algun tempo caba, sigur sindicato SADA a bin ta demandando pa Gobierno separa Cuerpo di Aduana for di Servicio di Impuesto. E separacion aki ta bin despues di 27 aña di Status Aparte, cu awor Gobierno ta haya dos departamento. Esta Departamento di Impuesto y Departamento di Douane.

Consecuentemente for dia 1 di januari ultimo, e dos departamentonan menciona, a haya dos Director General nobo. Pa Cuerpo di Aduana, a keda nombra Nick Quandus, kende a forma parti di e recientemente Management Team y kende a haya e tarea pa pone e departamento nobo aki funciona, pa na final, tene un open sollicitatie p'e proximo Director General di Departamento di Douane. Cu nombramento di Nick Quandus, un ex-Inspector di Aduana, a pone un banda e actual Director, sra. Corine Cabenda, kende sigur a protesta e proceder aki. No ta conoci, ki paso e lo tuma pa keda den su funcion. Hunto cu e dos personanan menciona,

a nombra mr. Stephan Maduro pa forma parti di AltoMando di Aduana.

Otro persona nombra ta mr. Diana Croes como Director General di Departamento di Belasting, kende a bin ta actua como Director interino pa algun tempo caba. Como Director Operacional a nombra Mario Arends y como Director Operacional, mr. Ricky Croes. Cu e nombramentonan aki, nos por a compronde cu Gobierno a duna un "golden handshake" n'e Directora anterior, esta sra. mr. Ritza Hernandez, kende a haya un compensacion di varios mil di florin, pa mes entrega su retiro. Gobierno kier a deshaci caba di sra. mr. Ritza Hernandez, pero el a bringa su caso den Corte y a gan'e tambe. Pero Gobierno a dun'e vakantie obligatorio, p'e no mester bolbe trabao mas, pasobra e actual Minister di Finanza, no tin confianza den su persona. Otro persona cu di acuerdo cu nos informacion cu Gobierno lo a duna un "golden handshake"

ta Cesar Angela, kende tambe lo a haya un suma cuantioso pa su retiro.

Di e forma aki, Minister di Finanza, Mike de Meza a cumpli cu su promesa haci e.o. na sindicato SADA, pa Cuerpo di Aduana bira un cuerpo independiente, cu e garantia cu lo mester bay genera mas entrada pa caha di Gobierno. Tambe lo re-introduci e sistema di ASYCUDA, cu ta mas eficiente y efectivo den maneho di Aduana. Esaki lo bira un tarea di e Director nobo, Nick Quandus. E lo tin tarea tambe pa na luna di april awor, organisa e Conferencia Regional di Aduana, cu lo tuma lugar na Aruba, unda e Cuerpo nobo di Aduana di Aruba, lo expone su mes y divulga su forma nobo di funciona.

Lamentablemente, e decision di Gobierno, no a keda anuncia oficialmente ainda, pero nos por a compronde cu otro siman Minister Mike de Meza lo bin den un conferencia di prensa pa duna splicacion den detayes

di e decision tuma.

### RESISTENCIA

Mientrastanto tin varios resistencia, pa no bisa incertidumbre. Maske cu Sindicato di Aduana (SADA) a bin ta boga for di 2009 caba riba e "independizacion" di Cuerpo di Aduana, te awe nan mes no a duna nan comentario riba e decision tuma aki, pero tur hende lo ta contento cu e logro aki.

Te ainda, oficialmente nan no a keda participa di e cambionan cu a tuma lugar, unda sra. Corine Cabenda a ser poni un banda y Nick Quandus a keda nombra como e Director General nobo di Departamento di Aduana.

Na SIAD, cu tambe e cambio a tuma lugar, mesun cos, no tin un participacion oficial y ki cambio por spera.

Awor ta surgi pregunta, cu e separacion aki, di Departamento di Belasting y Departamento di Douane, si esaki ta bay requeri mas personal? Cuanto

puesto na nivel di gerencia a keda habri, y kico t'e criterio pa ocupa un di e 5 puestonan nobo di director, y cuanto e costo lo ta si tuma na cuenta cu cada puesto di Director, sigur lo bin na remarke di un salario na nivel di schaal 16. Tin placa presupuesta pa cubri esakinan? Net awor, cu ta papia di mester baha gastonan di Gobierno? Con a para cu e "kerntaken analyse"?

Si analisa henter e desaroyo aki, unda ex Minister di Finanza, Nilo Swaen (MEP) a dicidi di institui un grupo di trabao pa bin cu diferente reorganizacion, cu te awe no a ser cumpli cu nan. Meta di e reorganizacion aki tabata pa SIAD por funciona mas efectivo y eficiente posibel. Pero tur hende sa con SIAD a bin ta funciona, cu te awe ta ser cuestiona, despues di a inverti varios miyones pa Aruba tin un SIAD cu lo ta uno ehemplar, pero cu sigur no ta. Ta di confia, cu e cambio aki ta pa mihor. No por spera otro tampoco!!!

Minister Mike de Meza:

## Aduana nunca a haya e atencion cu nan merece

**DEN** conferencia Minister Mike de Meza a splica cu tin diferente cambio cu mester tuma lugar riba nivel di personal pa loke ta nan posicion huridico. Esey no nifica si cu lo kita trahador for di trabou of cu trahadornan lo bai atras den nan rechtspositie. Tin algun persona cu tabata den directiva den dienst di aduana y tambe impuesto cu mester haya nan posicion den e departamentonan nobo di Aduana. E hendenan aki a wordo scucha caba. Pa hopi aña esaki tabata un deseo grandi pa aduanaronan para riba nan mes. Aduanaronan semper a sinti cu nan no tabata wordo trata igual. A base di nan mesun presupuesto y para riba nan pia nan lo ta mihor bezig. Tabata tin tambe e cambionan di Asycuda cu a bai over pa SAP y e cambio aki a trece hopi prob-

lema pa e servicio di aduana. Awor gobierno lo bai bek na e software di inklaring special pa aduana cu ta Asycuda. Esaki ta Asycuda World cu ta esun mas moderno y lo implementa esaki completo e aña aki. Aduana ta den procesonan di cambio grandi. Loke ta pasando ta bon pa ambos departamento y pa e clientenan di ambos departamento ya cu nan lo bira mas eficiente y efectivo.

Ta importante pa sa con lo hiba e maneho di e departamentonan nobo. Tambe ta importante pa sa ki tempo esnan cu lo ta encarga cu e maneho di aduana lo cuminsa funciona. Minister Mike de Meza a splica cu ariba na e departamento e propocision di e instancianan encarga cu e parti strategico a

papia di un director general cu tin e responsabilidad en general. Tambe lo tin un director financiero y un otro director operacional. E ta un sistema cu Aruba no a conoce den pasado pero ta ser aplica otro caminda rond mundo cu efectonan positivo. Ya caba SIAD ta den un periodo di trancision unda lo tin por lo menos dos persona di cada departamento den e proceso di trancision. Awor aki esnan riba mesa cu lo hiba e maneho ta Sra. Diana Croes como director general, Mario Arends y Ricky Croes pa loke ta e parti di servicio di impuesto. Pa e parti di aduana lo keda Nick Quandus, Corine Cabenda y Stephen Maduro encarga cu e maneho. Despues di esaki lo bai tin un solicitud habri unda esnan den gobierno y pafor

di gobierno lo por solicita pa asina finalmente escoge e directornan general, operacio-

nal y financiero pa Cuerpo di Aduana cu ta para riba su mes desde 2013.

